



SYNOD KIKHAWMPI 2-VEINA (NOVEMBER 16-19, 2023)

To,

If undelivered please return to - TPC Office,
 P.O. Box - 107
 D. Phailian,
 Churachandpur - 795128
 Manipur, India



ESTD. MARCH 2008
 DECEMBER 2023

Hinna Vâk

Monthly Christian Magazine

AN ORGAN OF THE TANGPHAI PRESBYTERIAN CHURCH



LAL THAK CHIBAI BUK HITIU

- Chamna Lal
- Khanglaite leh nunnawp
- Khrimas leh Lalpa Jesu Inkuan chanchin
- Lalpa a chun kipak un



EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hawipakkim, Secretary, CKNP
: Upa Genminlun, Secretary, CKKP

Business Manager : Pu Lalbiaklian, Office Superintendent
TPC Office D. Phailian
P.O. Box 107 CCPur-795128 Manipur
Phone No. +91 9089623251
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. LAL THAK CHIBAI BUK HITIU	04
4. CHAMNA LAL	07
5. KHANGLAITE LEH NUNNAWP	10
6. KHRISMAS LEH LALPA JESU INKUAN CHANCHIN	16
7. SERMON	
a) Lalpa a chun kipak un	20
b) Kingaidamna	23
c) Nangle a nungzuite lak ah pakhat hilo lahem?	25
8. HISÊLNA HUANG	30
9. KNP HUANG	31
10. KKP HUANG	35
11. SUNNA	37

Moderator : Rev. Ngurthanmawia Sailo
Secretaries : Rev. C. Lalrinliana (Sr.)
: Rev. Thanglianlal (Jr.)
Finance Officer : Rev. S. Khaikhawlam
Statistician : Upa Kaikhokam
Executive Secretary : Rev. S. Lama Vaiphei
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Tangphai Presbyterian Church Provisional Synod Kikhawmpi 2-veina chu lawting tak ah nei zaw a hi ziak in kipakthu gen hitiu. Chuleh, Synod puitu thakte leh committee bâk chuam chuam ah mawpuakna neite'n Thagau thiangtho umpina tawh a mawpuakna'u a zaw chiat theina ding un dawn hitiu.
2. Pathian maljawlna, Tâng leh Phai ah Lo bawlte'n thai chichuam chuam leh Bû leh Bal i lakkhawm thei ziak un kipakthu gen hitiu.
3. Kumdang guallo tak mai ah Kochuam tin ten Khristmas leh Kumthak hi mang ding hi ziang lenle Kochuam te'n Thagau lam malzawlina tamtak tawh i mat theina ding un dawn hitiu.
4. Gamsung buaina ziak ah panlatu pawl chuam chuam ah puitute a ding in pauchap hitiu.

KHAWVEL KIPAK UN

Hun buaium leh haksa tak kal ah khawvel kipakna ding thupha i Lalpau Jesu min in Khriemas chibai ka hung buk hi. I gamsung ah tualgal ziaka in leh lou chânta te, mualphona tamtak tawh galtai dinmun ah um ta te, zia zing kawm ah lusûn leh liangvai te i hi zing lai un chunglam akipat thucha hungtung chu *'khawvel kipak un la Lal a hung'* ti hi a hi.

A ziak chu- haksatna leh buaina namenlo in i insung, i namsung le hi gamsung ei chum maleh lei leh van Lal in ei hung kanthak ziak in i kipak ding uh a hi.

Kipak ding dan- lunggil zosia mun la awt leh kipak la sa thei ding la hi ti in ei hil a hi chu. I lunggil uh bawmneucha gual himaleh, a computer memory hin tamtak dawl a hi ziak in, khatvei sukthianna (format) bawlin Jesu â dingin mun zosia awt hi tiu.

Chuti taleh- ama chun khawvel nawpna'n vaihawm ina ti a hi. I taksa nawpna, i du leh ngai te sukpinglo khak ding lau in nisin i phe i phe sek ua, Lal Jesu hi mun i awt ualeh khawvel hi suknuam a gua a hi. Lungsiat leh thutak in vaihawm in tin, a hepina maktak dawng kha zosia chu kipak mai ding i hui.

Isaac Watts in kum 275 masang lai a pat ala mudaw khawvel limna leh kipakna thuguk lopi tak hi tukum 2023 Khriemas bek a hin ei unle mudaw tei vaisawm hi tiu. Zia gual chang ding a chun Lalpa'n hung malsawm tau hen.



Kochuam Huang

Relief House sakzawm zel a hi

Gam buaina ziak ah hung tâidawkte umna ding Relief In kisa chu a khatveina (In 97) zaw thian hi in, lua pat a hi tau ah, Kochuamte i pankhawmnau a kipak um takzet hi. Tuhin a 2-veina ding sakzawm ding in OM 17:6 chun lemkuatna a nei ah, Buallian tawh Sumtukphai khua ahin a kisa sate tawh kigawm ah In 100 gel gel suktin ding (i.e. Buallian ah In 59, Sumtukphai ah In 55 sak be ding) ti a hia, a sa ding in D. Phailian, Lamka, New Lamka, S. Munnuam leh S. Kawtlian Bialte guat a hiu. A sak ding zat uh le bithiak in, November tha lailak ah kipat khan nasepna a kipan kit thei tau ah, i pauchapnateu in delzui to zing thei leuhin pha ma ma ina.

Relief material hawpdawna

Mizoram Synod in buaina ziak ah haksatna thuakte kithuapina ding ah a hung dawlkhawm uh sil leh chên ding leh zân puan kigawm ah truck 4 hial chuleh, ûm leh

bêl thak (Rs.4,94,770 man hial) a hung thawtteu chu OM 19:3 phasakna dungzui in a chang ding dawlte kiang in New Lamka Branch KKP mang in hawpdawna hunkhawp a lah kinei tai. Tuhin zân puan leh ûm leh bêlthe hi a chang di dawlte kiang ah piakdaw ziang thei dingsa'n CKNP leh Office Staff-te'n khenzâksa in a kawi tau hi. Ziagual ah hun haksa i tuak lai ua ei panpitu Mizoram Synod-te chung in kipak um i sa takzet ah, i magazine mang in kipak thu i taklang uh a hi.

Synod Kikhawmpi

Gam buai ziak in i Calendar gual chet chet un i Kikhawmpi'u Committee-te mang theilo maleu hin, Kikhawmpi hun chu Calendar gual in Hill-town Kochuam Biakin ah, Lamka Pastor Bial zintunna in November 17-19, 2023 sung ah khan a zângkhâi thei pen in a lah kimangzo thei hi.

Synod Kikhawmpi 3-veina chu S. Munnuam Kochuam Biakin ah, S. Munnuam Pastor Bial in a zintun ding in siamlem a hia, a hun ding in November 19-24, 2024 guat a hi. Tu ah i Provisional Synod puitute chu ziate hi a hiu:

HINNA VÂK

Moderator :
Rev. Kamkhotinthang Neihzial
(*S. Kawtlian Bial*)

Secretary (Sr.) :
Rev. Thanglianlal (*Munpi Bial*)

Secretary (Jr.) :
Rev. Andrew LR Khiangte
(*Mata Bial*)

Finance Officer :
Rev. S. Khaikholam
(*D. Phailian Bial*)

Statistician :
Upa S. Thongzalat
(*Lamka Bial*)

Executive Secretary:
Rev. S. Lama Vaiphei

Consultant :
Rev. PB Zosaphara

Kum 2024 Calendar & Zillaibute

Kum 2024 Wall Calendar leh kum 2024 sung ah i zil ding uh lekhabute chu Office hour sung ah, Khristmas Chawl (i.e. 21/12/23) masang in chawk thei ding i kinem ah, Kochuam tinte'n ngaiven leuhin kipak um ina. Tuhin Wall Calendar leh kum 2024 Nilai Zan Thupi Bu ding chu zaw thian a hi ta, a dangte le December 10, 2023 masang ah chun kim tak ah zaw man ding kinep a hi.

Chun, 2024 Calendar ding

kisiam zaw nung in PCI lam apat Committee hun ding hiatsakna a kimu ziak in SEC leh Synod Kikhawmpi chun siamlem ngâite a siamlem hi, ziagual hin:

Pastoral Committee –
April 11, 2024 kiti chu April 3, 2024 zawk hi ding.

Sunday School Committee –
August 1, 2024 kiti chu August 6, 2024 zawk hi ding in.

Zia Committee hun kisiamlemte hi a pawimaw dungzui in tepte in, kisiamlem chiat ding in i kichial u'i.

Khristmas leh Kumthak Programme chungchang

I gam buainau hi navâk ziang tadi lo a hi ziak in Pawlpi leh hotu chuam chuamte'n Khristmas leh Kumthak-te hi luaithêna leh lénkhawpna panglo ah mang ding ah mipi leh Kochuam tinte chialna thu a sua dungzui un, ei uh Kochuam inle a thei chan ah zia kichialna thute hi ngâikhaw ah, zui chiat ding in i kichial u'i. Pauchapnate ah i haksatnate'u leh sawlkarpi ah i thildawtteu i lawtin theina ding un Pathian kiang in tut zing hitin uh, pauchapna lam in hât tak in pangzawm chiat leuhin dawi a um hi.

“LAL THAK CHIBAI BUK HITIU”

(Mt 2:9-11; Lk 2:15-20)

~ Rev P.B. Zosaphara
Consultant

Chibai buk chungchang hi genkham a um in ka hia’i. Nam chuam chuamte hin chibai i kibuk dan uh hi a kibang lo lemlum a. Ei haw hin chu khut kitutua in chibai i kibuk ua, kol leh vaite chu a kikawi thaw ua, biang a situa ua, khawlai ah a gal deu ah a kimu hun ua chun khutpek pani kawi khawm in a luzawn ua a kawi to sek u’i. Santalte chu kikhawikha keilo in, amau sang ah upa zawte masang ah a kun sek u’i. Kol leh vaite i gen khenkhat a ki chibai dan ua chun a za deu te’u kêng a va khawi piak ua, kingaitawmtak leh thunuaigawl tak in chibai a kibuk sek u’i.

Chibai kibuk ding a hin kingaitawm a pawimaw takzet hi. I melma te’u chu vang chibai i buk theilo uh chu a hi mai hi. Chun, chibai kibuk hi a lêm ah kibuk le a um thei mama hi. I mi za deute, eima sang ah dinmun sang zaw ah i hiatte i chibai buk dan leh eima sang ah dinmun niam zaw ah i hiatte i chibai buk dan uh a kibang keilo sek a hi.

Tuni i gending uh hi chu Lal thak chibai buk chungchang a hi. I lal thak CM telting pat chibai i buk hun hin chu ei he den theile ti i ut mama a, i za mama zia leh lopi i sak mama zia ah i buk le a hisek hi. Ama apat kinepna nei ah i chia hun diak diak in i kicheina tiang in i uluk diak a. Kam leh ha nin deu, van nin deu tawh chu ki chia ut keilo ding a hi. Zia hi khawvel lam ah i hotute i zâ

HINNA VÂK

dan leh i chibai buk dan a hi sek hi.

1. Belampute leh khawsak mipilte'n Lal thak chibai a buk u'i :

Lal thak hung piang chibai buk ding ah chiate hi Belampute, khawsak mipilte a hiu a. A kiang ua Pathian thu hung tung kha a awi ua, ama muding in a nei leh go thil te'u taisan in a chia ngal u'i. Zia thu hi lopi ka sa sek hi, " Lalpa'n ei hung hil chu va-en hitiu, a kitiu a. Tichun, kin tak in a vachiau a," Lk 2:15ff. Pathian in thu a hil chu mu ut ah kin tak in a vachiau a, Pathian thu dik zia ava muchian ta'u hi. Pathian pâk leh chawihawi kawm in a kile kit tau.

Ei un vang taisan nei ding i huphul mama sek u'i. I lawi leh pai te'n Khrimas/ Kochuam Programme um hun ah chia lo ding ah a hung pa hun un le i va "Awle" pai sek a. Taisan nei a ngaisek hi. Lal Jesu panna ding ah kilawmlo Programme

i guanggal zing sek ua. Belampute'n bangkim a taisan ua, Lal thak chibai a buk gual ua hin, taisan ding ah pawimawte chu Lal Jesu min in taisan hitiu.

Khawsak mipilte'n nausen Jesu chibai a buk u'i : Pil mama leule, a pilnau chun Lal thak chu a hawl dawk theipuau a. Awm le a awm a, Lal hung piang ding chu Leng In ah a et uh kha a awm in a hiding mawng uh le a hi. Aksi chanchin sui ah hechian mama te a hiu a, maleh lampi a mansua tho ua. Lal Herod lungthim a chawk tho tau hi.

Himaleh, mipil ti tak chu zia tak a pat chun a pawtdawk kit tau a, etding dik lam nga'n a mu ding diktak mun uh chu a puitung ta a hi. A gobawmte'u hawng in kipakna thilpiak sana, begaw leh murra a lân ua, bawkkhupin chibai a bûk u'i. Chun, Lengpa inlam zuan talo in amau khaw lam ah chia in lampi chuam a haw tau hi.

2. Lal thak chibai buk hitiu :

Khrismas ni i tung vang vang kit tau a. Khenkhat â ding a chun mang mun mama ta le ki hi'n a. Lâ phuaktu chun *'Khualbuk vengpa gual mai ka hi, Gitlona'n ei bawm zing'*. Lal Jesu piang chibai buk tak tak lo in i mang chai zel mai a hi em? Tuchung Khrismas a hin vang *"Jesu, tuni hin ka lunggil bawng In ah hung piangthak kit in"* ti in, kisukthian guaitiu in, khawvel hukdampa chu Judai gam ah a vâkvai kha huntawk ta hen, ti hi i panlak dingdan uh chu hileh phana.

Khrismas zingkal khat chu New York khawpi kawtbul ah naupang khuangpu thiangtholo deu khat chu, midang ten naupiang thak chibai a bûk sau sau lai un, Gan In leh Jesu piang na lim a kibawl umna mai a chun mitthi tui luang zung zung kawm in, *"Jesu, thilpiak mantam leh lul hung piak ding ka nei*

pu'a'i, ka neisun zia hi ka hung lân hi" ti in a khuang chu a khen a. A mutu leh a ngaithatu mitthitui luang lo kuama a um puau a tiu a hi.

Suapite haw, lâ i sak mun mama sek uh hi ngaitua chian thak kawm in sa hitiu... *"I lungthim mun hawn chiat leuhin, go thil dang a ngaina diak pu'a'i"* Sak liam mai hi chu a bailam a, himaleh a umzia nei tak tak nading in chu i lungthim hi ikilat tak tak a ngai a hi. I nei sum leh pai bep hiziang lo in i lungthim hi ama â ding in lân hitiu. Lungthim kilânte kiang a lungawina, kipakna bukim a um sek hi.

3. Thagau, hinnna, bangkim a chan ding in a kilawm hi :

Lal thak hin chibai bukna ding in bangkim a chan ding in a kilawm hi. La thagau, la hinnna leh la bangkim hung pe ziang in. Ama chu tuni bep hilo in, khawi tak mun inle, bang hun inle Lal thak chibai buk hitiu.

“CHAMNA LAL”

(Isai 9:6)

~ Rev. Andrew LR Khiangte
i/c Mata Pastor Bial

Pathian puina zal ah buai leh haksatna tamtak kâl ah kumtawp lam i hung tung thei kit tau hi. Khristiante hun pi Khristmas le i masang ua hung tung pai ding in a hung um kit ta, Pathian zal ah Khristmas chu lawting tak ah i mat ngei uh i kinem uh a hi. I hiat tâksa gual un gam buai ziakin kum dang ah thupi tak ah luai the ah i mat sek uh Khristmas kha tukum chu luai the lo ah i mat ding uh a hung bang ta. A bangchu hiziang leh le lâ phuaktu in *“I lungthim mun âwn chiat leuhin, gothil dang a ngâina diak pua’i”* a ti gual a khan tukum chu i lungthim Pathian lam ah hawng kawm in Khristmas lul tak leh teptetâk tak ah mang ding in kisingsa chiat hiti’u.

I thupi têt uh hi tulaitak ah i tuak uh tawh le a kituak mama a bang a, zia chu a hizinglai in gen huphul um tak le a hi kit hi. A ziak chu melma liantak nei ah ikingai lai ua Chamna thu tangko pi chu ngainawp um beklo ding in ngaituana in a lang hi. Himaleh zia Chamna Lal a hung na ziak hin khawvel pumpi hi a huap zo vek a, ei un le i pawimaw tak uh hiding in a gingchak um hi.

Lemna leh muanna ti hi paukam pani kizawp khenzak

theilo gual in a lang a. Hebrai pau ah Shalom hilchianna in a kimang sek hi. Shalom chun umzia lian tak a huap a, a chawm lam in thil zosia ah phatna, dinmun pha, bukimna ti te in a gen sek u’i. Zia Paukam apat hin Lal Jesu chu Lemna Lal a hi ti hi a kituak mama hi. Mihing hinkhua bukimlo tak mai, kicham theilo, dinmun sia tak chu bukimna hung siamtu chu Chamna ti ding tak chu a hi.

Sawlchak Paul chun a thei lai sia nangmau chung ah kinga ahi chun, mi zosia tawh kicham in um un a ti a hi. Zia apat hiat thei chu mihing leh mihing kikâl ah kicham theilo na ding tamtak a um hi. Himaleh kicham theilo tu hi guat sang ah chamna siamtu ihiguat chun chamna chu a hung um mai sek hi. Kichamna siam nading a chun a kingainiam zawk ah pan masak a ngai sek hi. Zia tigual kingainiamna hinkhua chu ei gingtute'n haksa isak pen uh a la hi zel sek hi. Chamna leh muanna hi Pathian apat hung pawt a hi ti hi Pathian thu zil mite gen dan a hia, a pawmtâk mama a hi. Pathian leh mihing kicham thei talo kicham kit nading in Pathian zawk chu hung kingaitawm in chamna palai na chu a hung sem ta a hi.

Khawvel hin chamna leh muanna hi a pawimaw mama ziang a. I khawvel dinmun i thîl chun kil tin ah kido thuthang hiatding a um zing mai hi. Gam gamla tak ah kidonate chu i ngaitua man puau a, i kiang

naicha ah kido leh kichamlona ziak a hin i buai zing a hi. Khawvel chun a kichamlote chu lemna siamgua in nasatak in pan a la zing a, himaleh tuni chan hin kichamna bukim chu khawima ah a tun sak theilo chu a hi. Zia gual munte a hin bangtigual in a h'em chamna leh muanna chu a um thei ding? Chamna Lal, Lal Jesu Lalpenna mun a chun chamna leh muanna a um sek a, gam khat leh gam khat, nam khat leh nam khat, mihingte kâl ah chamna bukim a um nading in Chamna Lal chun mun sang pen a chan a ngai hi. Mihing in a dikna leh a chanvo ding a channa mun ah chamna leh muanna a umsek hi a ti sek uh a hi. Isai 9:6 a Chamna Lal lalna gam hi khawvel lengte lalna gual hilo in dikna leh muanna umna gam a hi. Lal Jesu lalna munah chun dikna hi a kilang diak a, ziaziakachun chamna leh muanna a um sek a hi.

Zia Chamna Lal hin khawvel ah a lenlai in a thupi pawimaw takchu melmate hepi hih a hi. Ziachu Chamna Lal a hi zia taklatna chiang tak pakhat

HINNA VÂK

hi ngei ina. I melmate hepi ah pauchap piak hi Lal Jesu zilsakna a hi dan thu leh a phat dan i he un i gen zing sek ua, himaleh a tak ah mat ding in vang haksa i sa tângpi sek uh a hi. Martin Luther chu melma hepi theidan a dawng ua, a dawnhuna chun, *“ei leh ei kithunun masak a hi”* a ti a hi. A gen zawmna a chun, *“La melma suk minsiat nading, suk mualpho nading hun lemchang la mu hun ah la bawl ngamlona kha mani kithununna chi khat a hi”* a ti a hi. I huat leh melma ah i neite chu tawi khial in, ala nuisan le hin ti hi mihing lungthim in a um vak sek hi. Chamna Lal Jesu chun vang melmate hepi ding in ei zilsak a, Ama ngei in i ettawn thei ding ua a zilsakna leh a thugente hi mihing ah hung chang in a hung pal theng ta a hi.

Pathian in Lal Jesu Chamna Lal mangcha ah chamna leh muanna a um thei nading ah a hung lemguatsakna a lul zia hi hetchianthak kit ding in a pawimaw hi. I phatna ding ua bangkim ei petu phatchuam

ngaina hi kihiatlosak pua’itiu. Bible zil mite chun Pathian in chamna thuthung a siam chun malsawmna le a kengkawm sek hi a ti uh a hi. A bul lamah i gensa gual ua khan Chamna Lal hin mihing leh Pathian kikal ah Chamna bep hilo in mihing hinkhua ah a bukimna ding leh kawng bangkim ah a pha pen ei lemguat piak a hi.

Chamna Lal pianchampha ngak ah i um lai ua hin i lungthim un chamna siam ding ah i kisingsak uh a pawimaw takzet hi. Nam leh nam, insak inthang, Kochuam ah Pathian nasemte kikâl, khawtang ah nâ i sep khawmna uh leh i hinkhua kawng bangkim ah hin Lemna Lal hin mun sangpen hung chang thak kit henla. Chamna palai nâ semding ahin Pathian in ei dawina lam lam ah sem ding in kisingsa thak hitiu. Chamna leh muanna a hung um theina ding in ginumnate, phatnate, thudik ngainatnate hi hinpi lehin Chamna Lal chun i lunggil ah mun sangpen chang intin, Pathian kipakpi lam Khristmas lim takin mang ngei hitiu.

“KHANGLAITE LEH NUNNAWP”

~ Pro. Pastor Lalgoulian

New Lamka Pastor Bial

“Aw Khanglai, la khangdawng lai nikhua hin lim inla, la lèn lai ni hin la lungthim chu hilim in.” – Thugentu 11:9a

Khanglai hun hi sanakhang hawilai gual in a la gen sek ua, a ziak chu khanglai hun hi thawveng hun, buaina leh lunggimna’n a chup phak nailo hun a hi. Khanglai i hi sung a hin limna leh kipakna ding i hawl sek ua, insung ziang sang inle lawi leh pai pawlna hun tamzaw a ki mang phial sek hi. Nunnawp (Festival) hun inle khanglaite hi a thanuam pen leh a phul pen in a pang sekua, nunnawp supitingtu’n a pang seku a hi. Tuni hin masang ah khanglaite’n nunnawp a la mat sek dan’u leh tulai hun a banggual a mat ding a hi diam ti genkhawm hi tiu.

I. Khristian hi masang a 1) Sa chang leh sa hawl:
Khanglaite leh Nunnawp :

I pi leh puteu Khristian a la hi masang ua chun, khut nasem mi a la hui a, thagum ah nek hawl in, lo a bawl ua, bu leh bâl te chîng in, sa leh nga te man in hinkhua a la mang seku a hi. Nasep hun in na hâpi’n a sem ua, nunnawp bawl hun inle lim leh nuam tak in hun a mang seku a hi. Zia nunnawp a bawl phat taku leh Khanglaite hin mawpuakna liantak a nei seku’i.

Nunnawp, Kut a hem, gualnawp a hem a mat ding taku leh tangval te hin (Pa sakap thiam te tawh) sa a va kap chang’u a um sek hi. Sa chang, sa beng in tangvalte a pang sek ua. Sakhi hem ngal a hem a hung mat tak ua leh tangval te’n a hung puau a, khua a hun tun ding tak ua leh kiko thawm a nei sek ua, zia phat chuleh nungakte a lamtua dingin a kisau a,

HINNA VÂK

zubel tawh khawmual in a la vaidawn seku'i.

2) Nek leh dawn buaipitu a hiu: Nunnawp a ki mat tak a hileh Sa bawlte chu tangvalte'n a kithuapiu a, nungakte'n thing a puau a, tui a khai ua, chuleh tuilum, tuisa a hawm seku'i. Sa huan leh bu huan tiang a hin le khanglaite hin pate ahiloleh nute a kithuapi seku'i.

3) Lasak, lam leh tum-git: Nunnawp tak leh La a sa khawm ua, lamkualte, khiang lam te nungak tangvalte a lam seku'i. A chang leh nungak tangvalte hi jan khawvak a la sa leh lâm in a um seku'i. Tum-git bawl thiamte chun khuangte a khen ua, dak a sai ua, theile leh gawsem te bang a mut ham seku'i.

4) Kicheina Nunnawp chawimawi: Nunnawp hun a hin nungak leh tangvalte hi a hawi thei pen leh a nei kham tiang tiang ua a mawi thei pen in a kichei sek ua. Nungakte'n a sam te'u a sawm ua, puanak

hawithei pen ak in, khi te a ngawng in a awk ua, chaucha sau tak tak a but seku'i. Tangvalte'n le dial a kawp ua, puanak bânsau a âk ua, puandum puanchen a chengu'i.

5) Laphuak: Malai in nunnawp bawl na a chun mi pakhat in midangte ngaithak dingin thu tamtak gen ti hi a chîng bek puau a. Ahinla, chanchin a gennawp teu, sa a kap dan teu, ahiloleh a kipakna teu a gennawp'u chun la'n a sak thaw seku'i. Tangvalte'n le nungakte a lungsiat dan uh chu la'n a sau a, nungakte'n le la ma in a dawnhu seku'i.

6) Gualsiak kidemna: Nunnawp hun a hin khanglaite hin gualsiak kidemna a mat hun'u a um sek hi. Kitai têt, Kungkân chawp haw hi a ha bawl diak sek ua, a hat pen pen te bang kipakman zubel chîkpen ahem, samalphe khat a hem a chansak seku'i.

7) Zu leh Sâ nek: Khanglaite hin nunnawp hun takle Zu

leh Sâ a la nesek ngei u'i. Ahinla, Zu nek lam a hin a la kisum thei ma ma'u a, nungak leh tangval in zubele a chep sek ua, ahinla kham talua ah, a nasep dingu sem theilo khawp in a um ngai puau. Zukham talua um hi a la nuisan seku a hi.

II. Nunnawp Phatchuamna

Mi tamtak in nunnawp phatchuamna bang a um diam ti pawl le ki um maithei a hi. Ahinla, nunnawp hi mihingte a dingin pawimawna liantak a nei hi.

1) Taksa leh lungthim kisukhalna: Haksa tak ah na a la sem sekte a hi ziakun, zia nunnawp hin a la kisuhale seku a hi. A gim leh chawlnau a pat chawldamna a hi ban in a lunggel leh ngaituana teu kidawn jangkhai tua in nunnawp a la bawl seku a hi.

2) Kihepina leh kisawmdawltuana: Nunnawp ziak a hin khat leh khat kihepina a khanlet sak sek hi. Ne-khawm, dawn-khawm, lam-khawm theite chu

genthei haksat tuakni leh kipanpitua thei in a um ua, chuleh, dani leh lungngaini in le a kithamuan tua thei seku'i.

3) Kipumkhatna: Nunnawp hi khua khat a hem, nam khat a hem in a bawl takle a khua a hem a namsung a dingin kituakna leh kipumkhatna a suhat sek hi. Lim leh kipak taka nunnawp mat khawm hin mi a kingainat sak in a kipumkhat sak thei hi. Khawsung ah sep leh bawlding a um in le kithugual takin a sem khawm thei seku'i.

4) Chawn leh khan kiziltina: Nunnawp hun a hin a lian a neu leh a têt a khangte'n mawpuakna a nei chiatu'i. Upate'n sa a siam ua zubele a chep ua, khanglaite'n nek leh chak bawlte a kithuapiu a, nute'n bu a huan ua, nungakte'n tui a khai ua. Numei sep ding, pawsal sep ding, naupang sep ding aum chiat a, sang ah lianzawte thumat ding dan kiziltina le a hi sek hi. Khawtang leh Insung tiang

HINNA VÂK

ah khawsak leh umchan ding dan hiatna a hi bawk hi.

5) Khangthu leh Chanchin kipiak sawnna: Nunnawp hun a la kiphuakte hi a khang a khang a chanchin kipiak sawnna pakhat a hi. Nunnawp hun a hin nidang ah La kiphuak te sak hun a um a, La thak le a phuak zel ua, zia chun khangthu kipiak sawnna phatak a mat a hi. Gal-La, Han La, Salu La leh a dang dang te hin malai khangthu hetzingna a siam hi.

6) Chaga te a dinga niang taka umthei ni: Nunnawp hun a hin khua hausa hem, ahiloleh a neizo deu te'n vawk a hem bawng a hem a tuak sek ua, a genthei leh hausa khenchuam umlo in, ne-khawm leh dawn-khawm in a um seku'i. Chagate, zubel sabel neizolo te'n le niang takin a nethei seku'i.

7) Insung Siamdawktu: Nunnawp hun hi nungak leh tangval kilungsiatna siam pitingtu khat in a

pang sek hi. Nunnawp hun a hin nungak leh tangvalte a kimutua ua, a nekhawm ua, a lamkhawm ua, zia chun kingaina a hung piang dawk sek a, kichenna leh insung siam pitingna in a hung zui sek hi.

III. Khristian Khanglaite leh Nunnawp

Khristian i hung hi pat ua hin gingtu masate hin i chawndan uh leh nunnawp a la kimang sekte Khristian tawh kituaklo ah a hiat teu tamtak hi a la haisan ua. Ahinla nunnawp khenkhat – Kut, Awl-len, Thazing Lap te i hung mang kit tau a, chuleh Khristian i hi nungua hin Khristmas leh Kumthak Lawp te hi i mang sek ui. Khanglaite'n bang guala mat ding a hem ti genkhawm hi tiu.

1) Taksa leh lungthim kisukhalna: Nunnawp hi mihingte a dingin kisukhalna damdawi pha ma ma a hi. Taksa gimtak â dingin chawldamna a hia, chuleh lungkham leh lungjinnate le nunnuawp hun a hin ei hiatmil sak

sek a hi. Limna leh kipakna ei nei sak in, taksa leh lungthim â dinga damna ei piai.

2) Khristian dan tawh kituak a mat ding: Masanglai a Kut, Awl-len ahiloleh Thazing Lap te a la mattheu hi tulai a hin le i mang sek ua. Zia haw hi a la matna ziak'u Khanglaite'n hetmilo dinga hin, Pathian dawidan tawh kituak ah mat zawm zel ding a hi. Masanglai chawn leh khan hiatzingna a hi ban in, Pathian ei mapuina ziaka kipakthu genna in mat ding a hi.

3) Zu leh Khamthei tawh matlo ding: Masang in zu leh sa ne'n nunnawp a mang sek ua, tulai in Khristian dan tawh zu dawn hi kituak in ngai a hi ta pua, zia ziak a chun tulai nunnawp i mat a hin zu leh khamthei him him hi bawl lo a phai. Zu leh khamthei panglo a nunnawp hi nuam taka matthei a hi ti hiat ding a hi. Masang in le zu kha a la nawpsakna penu a hi pua, ahinla a

kipawlkhawm ua, lim taka a nuikhawmna teu kha a nawpsaknau a la hi zawi.

4) Khanglaite tawi leh chan a pang ding: Masang a khan le nunnawp a mat tak ua leh khanglaite a tawi leh chan in a pang sek ua, chuleh sep leh bawl ding kha a ki het ma mau a hi. Zia gual a chun tuni tiang a hin le khanglaite hin i sep leh bawl ding hemil lo in, nunnawp matna hin thada taka umlo ding a hi. Semthei leh buai thei ah um hi a nawpna a hi.

5) Nunnawp jemhawi leh cheimawi ding khanglaite a hi: Nasepna lam bep hilo in, nunnawp jemhawi leh cheimawi tu chu khanglaite a hi. Kicheina lama te, mi vaidawanna lama te, mi nasep piak lama te leh kipawlp na lam zosia a hin khanglaite hi a fel'u chun nunnawp sulawtingtu a hui.

6) Chawn leh Khan hiatna mat ding: I khangthute, pi leh pu bawl ding dan, upate za ding dan, thumat

HINNA VÂK

ding dan, paukam kilawm mat ding dan, insung leh khawtang kivaipuak ding dan te haw zosia hi nunnawp hun a hin a hung kilang dawk sek a. I pi leh puteu in chawn leh khan hawitak tak a la nei teu i hiatmillona dingu leh, khang a hung chia zel a le khangthu leh thugosia, umchan, tawidan leh paudan kilawm te i hiatzawm zel theina ding ua hin nunnawp hi mat phatchuam a pawimaw a hi.

7) I Thagau suhattu mat ding a hi: Thagau lam i gen khak a hileh nunnawp tawh kituaklo gual a ngai pawl a ki um sek a. Ahinla Khristian te a dinga nunnawp sangpen chu thagau suhattu nunnawp a hi ding a hi. Pathian chawihawina, Lapawl sakna, la chang sakna ahiloleh thiangtho taka gualsiak kidemna i nei ua, khamthei panglo a nek leh dawn tawh niang taka i

mat seku a hi chun i taksau bep hilo i thagau hinkhuau le ei suhat sek a hi.

Thukhakna : Nunnawp hi Pathian in a zada pua, Thuthung Lui lama pat a khan Israelte'n le nunnawp a la bawl seku'i. Tu hun a hin le nunnawp chu i bawl zing nalai ui. A pawimaw pen chu nunnawp i mat a hin Pathian dawidan a hi na em ti ngaitua zing ding a pawimaw hi. Thugentu chun "*Aw Khanglai, la khangdawng lai nikhua hin lim inla, la lèn lai ni hin la lungthim chu hilim in*" ti maleh a tawpna chun "*zia haw zosia ah hin, Pathian in vaihawmna hun pui lut ding a hi ti hezing in,*" a ti'i a hi.

Lekhabu ette:

1. B. Lalthangliana, *India, Burma leh Bangladesh-A Mizo Chanchin*
2. Liankhotang Vaiphei, *Vaiphei Thusim Chawn leh Khan.*
3. Vumson, *Zo History*

“KHRISMAS LEH LALPA JESU INKUAN CHANCHIN”

~ Rev. K. Jama Vaiphei
S. Munnuam

*Tichun, achapa masa pen chu ahung piang ta'n; nau tuamna
puan in a tuam a; khualbûk a awn tâklo ziak in, gan ankuam in
a sial tau hi ~ Luka 2:7*

Tulai in Intin a Calender idawi val set set uh nei ta ma leu hin malai a ipi ipu te'u hunlai a chun “Pakbuang/ Tangsamlo apak tai Khrismas anai tai” atsek ui atiu. Khrismas chu gingtu ihi ziak ua i lawp bep uh hilo in i khawvel nunawp luiteu thasang (substitute) ahitâk ziak in ila ngaithupi'u in ila mang gun sek mama ui. Ki singsak lawkna le ala nasa a hi. Tuithei satdi, thingpawdi, thawlawm dawl didan, Sizo thiak di, pawlbuk (hall) sadi pawl, a dang dang atam hi. Anawp theipen leh a lim um theipen ding in i kiging sek ui.

Tukum ah Khrismas zat chuamna :

1. Kumdang guala taksa le thanuam taka kisalawka, lim taka imat sek gual lo deu ua mang di i hi tuak ui.
2. Jerusalem kulbang bawl Nehemia lawi in a khut langkhat ua Chemsau chawi kawm a kul bang alep thak gual ua ki-galven kawm ah Khrismas mang ding i hiu.

3. I insungmi, ikhawte, i chipiteu tamtak eitha piak ziak ua, kimlo tak leh lungthim natak leh lunghel tak kawma mang ding ihui, vuiman nailo le hung himai thei...!

Lal Jesu te Inkuan apat ettawn ding ah pawimaw kasak te :

1. I Lalpau pian na mun: I châng têt un a gen gual in Khualbuk a kidawl lo ziak in

HINNA VÂK

Bawngbuk ah atung ua, Lal Jesu ngeile gan an piakna kuang in sial a hi.

- 2. Lal Jesu pian zaw ah va en masapen te:** La Jesu pian zaw ah va en masapen te kha kua mi thupi, thunei, leng inkuan ahi puau va Bethlehem khaw kiang nai a Belampute gamlak khul laka Belam giakpite ahiu(Luka 2: 20).
- 3. Nazareth Jesu:** Jesu a nu le pa'n Aigupta lama azam piu a, Herod thi nung a ahung kile kit ua khan khawpi lam Bethlehem, Jerusalem ti haw a ngaitua puau, a khawlui lam uh Nazareth lam ma kha azuan ui. Nazareth in a seilian a, Nazareth ah thilpha apawt ngai em? kitina gam mi hi chu a da puau. Baptist Johan aman ui ti ahiat phat in Kapernaum lam, Zebulun leh Napthali gam, gam thawmhau um gam in ava chengden nalai set hi (Mathai 4:12-16)
- 4. Mihing chapa Jesu:** Lal Jesu khan ama leh ama aki gen

phat leh "Mihing chapa" le akiti sek hi. Philippi lekhathawt bung ni a khan "mihiam guala hung piang a; Suak gual in aki ngaitawma" ti in Sawlchak Paul in a gen hi (Phil.2:7). Mihing chapa a kiti nawpna hi ama i pawm bailam nau khat a hi.

- 5. Lal Jesu te Inkuan hi naugual ahiu:** I bible dungjui in Jesu hi Marin a pawsal neima a wawp bep hilo in Josheph in a guk ah haisan gaw maleh Vansawlchak in la zi ding ah kichenpi di lau kin, a nauwawp hi Thagau thiangtho wawpsak a hi ti a hil phat in a zi ding in a kipui ta; himaleh a chapa masapen a nei masia a luppi puai a ti'i. Jesu pian nung in Josheph leh Mari cha numei a min kigenlanglo ni leh pawsal pali - Joseph, Jacob, Juda leh Simon te hi dan uh Mathai 13:55 in a gen ah, Marka 6:3 in Pawsal 4te min a gen kit zaw in a suapi numei te a um thu'u a gen kit hi. Sawlchak Paul inle Gal.6:19 in Jerusalem ah Lalpa Jesu suapi Jacob

a kimupi thu a gen kit a; Jakob lekhathawt zikpa hi Lal Jesu suapite panina, alimlai a ama taksanglo a vainung lam ah a taksan bep hilo, Jerusalem khua Kochuam puitu buldet khat a le pangta a hi a kiti'i. Inkuan tawm talua hi Nam manthaina di a hi.

6. Lal Jesu'n Gethsmani huana

“Thagau in a ngamna'n taksa'n a zo puai “ ti anungzui te imutsuaklai a ala gen kha tukum idinmun diu hung hidi hileh akilawm hi. Thagau ah kipak nuam mama Taksa ei sun thei ling tam, “i Lawng te'u gik tawh tuifawn sân tawh”.. In leh lo kangtum, nei leh lam tamtak chên, kochuam a mi pawimaw tak tak Pastor te Bial buai, Upa suan um tak tak, phatchuam ngai tak tak pem upa hung suak, Elijah guala Pathian kianga phunnawi ut bailam mama leh kilawm.

7. Kum li vel chiata Aizawl Zarkawt Biakin ah Synod khawmpi kimat kum ah Moderator pawtdawk ding

pa'n Valedictory Sermon agen na point khat “Synod inkhawmpui zaw atang hian Berampu Lal ber chu Beram ma ka tang dawn taw a, ka Be e thiam dawn emaw... Bialtu Pastor leh Kohhran Committee hmahruai na ah ka awm dawn taw a... atia, Synod level, PCI level tianga puitu pawimaw tak tak tele ahung pension ua, tualsung, Bial leh Presbytery leh Synod leh PCI Committee chuam² in apang ua, a semlai te'n le mat phatchuam dan athiam ua, ki ngaiselo ah aum didan uh a ngaituau a, amau hawn le asem lai chapang zaw anau te'u gual, achate'u gual, khenkhat a senior diak te a ding ah atuteu gual le tam maithei...kingaitawm tak leh ki ngaichang thiam tak in asem khawm ua.. kochuam liantak lakh guk val aki khaihawm thei ui. Ei un kum 20 vel imit un imu'u va, ibil un ingaithau va zuithiam divem thiam lodi ahun dungzui in hung kilang ina...iki ha zil uh chu

HINNA VÂK

ngai maithei.

Habakuk in Theichang kung pak vullo in, Olive huan te thawn in, Ganchate ahuang a um talo lehle ka hukdamna Pathian achun kipak zing ka ati. Lal Jesu'n Kraws lêk ah "Hepa amau hi ngaidam in" ati. Jesu nungzui martyr masapen Stephen in Jesu gengual a kikawppi thei dante ngaitua

in, Jesu gual ah a hethiam lote dawthei tak ah ngak a, Leng David gual ah "*ka da-umna hi kipakna Lalpa'n ei sâng piak thei a hi*" ti hi Khrismas leh Kumthak hun sung leh kum hung tung zel ding ah taksang in "*Lopi tak ah ahung nadi*" ngak zel din i kidawisak ui.

Khrismas leh Kumthak matnuam !

THAGAUAM PAUKIKNA

- 'Dantakleh' tihi Setan changmi thâng mui-ai pen chu a hi.
- A vâk in vâk phawt lechin, Pathian in mi mutheina ding mun ah kawina ding hun he na'n a.
- Nazareth khua tangval thingkuang siamtu tawm tak leh genthei tak kha, khawvel pumpi siamtu leh guanggaltu hausa tak leh thupi tak kha a hi.
- Mipilte'n Khrista chu a hawl zing ui.
- Khrista a thi'i ti chu 'Tuanthu' ahi'n, Khrista kei di'n a thi'i ti chu 'Hukdamna' a hi.
- Tumalam hun a Khrista thawkikna kha tunung ah gingtute kinepna thupipen chu a hi.
- Mipil thepna kipat a taidaw tak leh, a tunna ding address a nusia malam khel ngai puai.
- Khawvel chun 'lawtinna' Lallukhuk a khuksak sek un, Pathian in ahileh chu 'Ginumna' chu Lallukhuk a khuksak sek hi.

~ S. Doliand Capvung, Muanna Aksi Oct-Nov, 1982

“LALPA A CHUN KIPAK UN”

(Philippi 4:1-13 ; Neh. 8:10)

~ *Upa Kamthang*
Sugnu

Thumapui : Phillipi Kochuam hi Paul Missionary khualzin a vel nina ala phudaw a hi. Gingu masa pen chu Lydia leh Sungkul ngakpa leh a insung mite kha a la hui. Phillipi Kochuam hi Europe gamsung a ding ah Kochuam masapen ala hi. Zia Kochuam kiphu daw a pat kum 6 sung chu Luka in ala enkawl hi a kiti'i. Kipakna kiti hi a lekthaw sung ahin 16 vei a kigen hi. Happiness kiti hi thilsuak (events) haw ah kipat ahin, Joy kiti ah leh vang Pathian a pat kimu a hi. Philippi Bible hi kipakna lekthaw ahin, Lalpa ah kipak ding thu kigena ahia thudang mu ding a tampuai. Ziagual ahin Philippi Bible hi khen in a um hi.

1. Haksat genthei ni ah kipak ding thu : Philippi Bung 1:1-30
2. Pathian nasepna ah kipak ding thu : Bung 2:1-30
3. Gingu hinkhua kipakna ding thu : Bung 3:1-21
4. Thilpiak ah kipak ding thu : Bung 4:1-23

Bang ziak ah Lalpa ah kipak zing ding ihu em?

Gitlo thina ah kipat ei taddaw leh a cha ah ei siam ziak ah i kipak zing ding uh a hi. Cha ah ei siam ziak bep hilo in golua ding ah ei siam uh hi a lopi ma ma ziang hi. Ziakiachun i kipak zing ding uh a hi.

1 John 3:1 ; Philippi 3:9-10

Ziakiachun Ama i pak ua i chawihawi ding uh a hi. Pathian in a cha ding ah ei siam khel ah lopi zaw ding a umlo a hi. Minister cha khat bawn ki hi zolo ah Pathian cha i hi ziang uh hi banggual bep ah lopi ah tam! A kumtuang go lua ding in ei siam nai hi.

HINNA VÂK

Lalpa ah i kipak zing theina ding ua bangti um ding ihu em?

Lalpa ah i kipak zing theina ding uh a nuai ah thu te hi vak enkhawm hitiu. Ei uh gel dan in taksa damtheina, lawtinna, malzawlina kichang hen lang, i bawl zosia ah lawtinna i chan phat leh Pathian ah kipak tak ah Hallelujah tia kiko ding in i kigel sek ua, zia chu khawvel kipakna mai a la hisek hi.

Lalpa ah kipakna kiti hi Taksa lam malzawlina leh kipakna ding zosia a bei nung a le kipak zing thei naklai hi a hi. Bible ah kigen gual in Thagau ah kipak zing mi khenkhat enkhawm hitiu.

a) Jawlnei Habakuk i et chun a lo ma zosia leh a gancha zosia a bei nung inle hukdampa leh a Pathian ah chun a kipak zing nalai hi (Habakuk 3:17-18).

b) Mi masa Job le a nei a go zosia leh a chate natiang a mangthai nung in ama ngei le a taksa meima ah dim ah hinhua a matzing lai inle Pathian chung ah kipakna ding a nei thei nalai hi (Job 2:7-10)

c) Sawlchak Paul chu suangkual sung ah a umlai inle Pathian ah kipak zing un ti'n Philippi Kochuam mite chu a la tilkho nalai hi (Philippi 4:4).

Zia a chung ah i taklat te hi i et ahi chun taksa lam ah kipak na ding neilo ahiu a, ahinla thil zosia hi Pathian ah kipat ahi ti a hetchian ziak un lim leh kipak tak ah um in thinung a le kumtuang hinna ei pia nalai hi ti hepum in Pathian a chawihawi sek uh a hi. Khaile Unau, tuni'n nang leh kei zia gual dinmun chun um kha tale hin Pathian ah i kipak zing thei na diam? Ziakiachun ei uh le a thak tak in kisuhathak ding in i kichial uh a hi.

Etsakna : Joni Tada Erickson chanchin chawmkim :

Ama hi Swimmingpool ah a kizana a kipat hung damlo in a taksa pumpi chu a hung zeng in damdawk zo talo ding ah kingaitua ah a kigel siat lai in nikhat chu a kiang in a lawinu a hung kichu, bang atia kingaisia la hi em lawinu? Pathian chapa Jesu Khrista le Kalvari kraws chung ah tawi theilo in zeng gual in a khenden ua a hivangin zia chu Jesu'n a Pa kiang ah kipak tak ah a thawkwaw ahi ti

chanchin a hil phat in ama le thamuang in Pathian kiang ah kipakthu a gen hi. Suapi tuni'n nang leh kei le Pathian a dingah khat leh khat kitil kho zing ding in i kidawisak ui. Kipak tak ah hinkhua mat ding hi i kizil uh a ngai ma ma hi.

Tulai i Kochuam sung uhi i et leh kithutuaklona, pangkhawm theilona in i dim gam tau a zia chun kochuam sung leh Pathian nasepna a subuai zing hi. Pathian cha a hilo leh a nasem ah kigel ah mi tawh kicham theilo na hin Pathian Lalgam nasepna a subuai zing sek hi. Tunin'a thak in kingaitua phakit hitiu in, kisubwaitua hilo in thupha kichawitua hizaw ding in i kidawisak ui.

Pathian ah kipak zing theina ding in galvan hawipen chu Pauchapna hi a hi. Sawlchak Paul inle Philippi mite kiang ah bang macha lungkhamna neilo ah pauchap zing ding in a la tilkho a hi. Nang leh kei le Pauchapna hemil lo ding in ikichial ui.

Pathian ah kipak zing theina ding ah pawimawte :

1. Nisin ah Bible sim zing ding.
2. Nisin ah Insung maicham leh pauchapna nei zing ding.

Tulai ahin ei un kipakna i mu guat dan leh Bible ah Thagau mite kipakna mu dan a kikhe ma ma hi. Ei un khawvel ah kipakna thil mu ding bep i ngaitua zinglai un amau in vang Jesu Khrista a kipat kipakna mu ding a ngaitua zawu a hi. Khrista a pat kipakna chu kipakna bukim a hi ziak in tuni'n nang leh kei inle Khrista a kipat ah kipakna bukim del ding in iki chial ui.

A tawpna in midang tawh i kikal siamphat dingah i, i Insung mi, kochuam mi, khawsung mi, area mi zosia tawh kituak ding leh Khrista tawh i kikal le nising ah siamphat ding a pawimaw mama ziang a hi. Aziakchu kipakna leh thahatna hi thildang ah a um pua'n Jesu Khrista kiang bep ah um a hi ti hiamil lo ding in ikichial ui. Setan vaihawmna gam khawvel ah cheng ihi naklai ziak un nisin ah kipakna i mu theina ding un Khrista tawh kivawp zing le hin i lungthim ah kipakna bukim ta'n a. Lasiamtu'n "Kipakna thak lunggel ah kanei hi Jesu ei piak ahi" ati. Ziaziakchun nisin Jesu tawh i kivawp zing theina ding in a thu Pathian in ei malzawl piak ta hen. Amen!

“KINGAIDAMNA ” (Kol.3:13 ; Mat.6:14-15)

~ Pi Nengneithem
Asst. Secretary, CKNP

Amasa'n kum 2023 gam leh nam buaina, haksatna tampi um maleh kumtung kei ah ei ma puitu Pathian ka chawihawi hi, chuleh tuchung ah article zik ding ah ei hung dawisaktute chung in kipakthu kagen hi.

Kingaidamna ti thupi mangcha chawmcha ala holim khawm ding ihu. Kolossa 3:13 na'n *“kidaw zo tua chiat in, kua'nle mi chung ah thubuai nei taleu chin, kingaidam tua unla; Lalpa'n a ngaidam gual in kingaidam tau in”* ati. Ngaidamna kiti thumal hi Bible ah thu pawimaw tak khat chu a hi. Pathian in ei hepi leh lungsiat ziak in a chapa changkhat neisun Jesu Khrista mangcha'n Kraws ah i gitlona'u zosia tawh kikhenden in ngaidamna i chang ua kumtuang hinna ei pia a hi. Ziagual ah Pathian

in ngaidam chang tâklo ama thupiak zuilo Setan nungzuite chu a hepina ziak in ngaidam i chang uh a hi. Zia ngaidamna jâl a chun Pathian cha hina i chang u'i. Ziakiachun kingaidam tua na hi Pathian chate hinkhua ah i chiapi zing ding uh, Pathian cha ihi na'u puandaw na ding ah pawimaw tak chu a hi. Mihing hina ziak in titlo na leh tâksapna tampi a um sek a, kihiat khialna le a um sek hi. Hi ziang lele, malam ah kihethiam tua ah khat leh khat titlo hun a le kingaidam tua ding hi Pathian chate um ding dan a hi. Jesu'n Peter

kiang in, la suapi sukkhialna la ngaidam zing ding ahi ti'n a hil a hi (Matthai 18:21-22).

Chuleh, Matthai 6:14-15 na i et chun *“La chung ua thil hi'khialte la ngaidam ua leh, van ah la Pau chunle nang uh hi'khial hun ngaidam ding a hi. Himaleh, nang un la chung ua thil hi'khialte la ngaidam lo ua leh, van ah la Pau inle nangmau thil hi'khial chu hun ngaidam diak pua'n a”* ti'n a kizik hi. Ziakiachun Pathian in a chapa Jesu jâl ah ngaidamna i chan gual un ei unle i chung ua thil phalo bawlte i ngaidam ding uh a hi. Tulai i kochuam sung ua a pawimaw pen khat chu kingaidamna hi a hi. Pathian kiang ah i pauchap na in hunzosia'n ka sukkhialna ngaidam in ti'n i pauchap sek ua ahinla i chung ah mi sukkhialna i ngaidam nuam ngailo uh a hi, zia hin Pathian chate hinkhua leh kochuam apat gammangna a suaksak sek a

hi. I lungthim ah mi sukkhial na haw ngaidam theilo ah i um phat leh lungthim kipakna a kineithe pua'n, thilsia bawl te'n bangma hephalo maleu i lungthim natna'n a dim sek hi, a changleh Pathian cha i hinau jiang le ala kihemil theisek a hi. Ziakiachun Pathian in Khrista mang ah hepina sangpen ah ngaidamna i chan na'u hi hemil lo in enle mite sukkhial na ngaidam leu hin taksa leh thagau kipakna mu ding ihu. Kingaidam tua na hi vangphat na le a hi.

Chuleh, kihepi tua ah, kilainatna nei in um unla, Pathian in Khrista ah a hun ngaidam gual in kingaidam tua tau in (Ephesa 4:32) na a kimu gual in kihepitua chiat leh kilainat tua ah kipak leh thanuam tak ah hinkhua mang zing thei ding in, khat leh khat ki ngaidam na'n chamna Lengpa piang lawm ding in iki chial uh a hi. Pathian in a thu ei malzawl piak ta hen.

“NANGLE A NUNGZUITE LAK AH PAKHAT HILO LAHEM?”

(Johan 18:25)

~ *Pu Kamzathang*
Revival Speaker

Lal Jesu nungzuite chanchin a hin hunpi kibanglo tak tak chi 7 (sagi) a la tuak ua. (1) Jesu'n a ko masangte (2) Jesu nungzui ah haksatna tamtak tuak bawk maleu Jesu jâl a mi ngainat, mi ên, mi ngaisan leh hamphatna tamtak a lawlai nite'u (3) Jesu huntawp ding kuan lam ah hun haksa tak a tuak lai nite'u (4) Jesu a thi ah a thawkit masangte (5) Thân a pat a thaw ah Van ah a kalto masangte leh (6) Van ah a kalto a Penticost tun masangte (7) Penticost Thagau Thiangtho a hung tun hunte kha a hi.

Nungzuite'n hunpi pawimaw tak tak a la tuak te'u lak ah hin, Nangle a nungzuite lak ah pakhat hilo la hem? Ti ah a dawtna'u hi a hun leh a mun zil in, dawnhu bailam tak hithei intin, a hun leh a mun zilin dawnhu haksa tak le hithei ngei ina.

Kum tamtak masang a Jawlnei te'n a la genlawk uh a la ngakla mama'u Messiah hi ngei ding ah a ginchak

uh, thilhithei tak, damlo natna tincheng sudam thei, Huipi leh Tuifawn a thu thu umsak thei thithate natiang hial chung ah le thunei ah nawmang ah a thunuai ah umsaktu, Mizosia'n mak a sak khawp ua thilhithei leh a ngaisan uh Jesu nungzuitu hi a nawp ding dan chu. Damlo a sukdamna munte, Thilmak a bawlina mun ah te mipi hung pungkawm te'n a ma khule

a nungzuitute lak ah pang a hi, ati laite'u ah khan kisathei mama sek ngei inau. Zia hunlai a khan Peter kha nang hi a nungzuite lak ah pang le hipuan la pawtdawkin ti leu chu Peter kha banggual tak in a lungna diam? Mipi hung pungkawm sekte khan a nungzuite a hi a hetlo khak ding uh kha lau mama zaw ngei in au.

Hun sawt le chiaman lo in a lim leh kipak nate'u leh a kinepna te'u zosia chu a hung chuai ah thil umdan te chu a hung kitheng danglam zota, La phuaktu pakhat in, *"Awnanghaw Jerusalemte haw, a lungsiat la chan uh kha hiau in, La nat tincheng ahi dam kha lam, a lungsiatna hemil lo zen un"* ti ah La ala phuak hial ziang gual in, gamsung leh khawtanga vaihawmtute sakhaw puitu leh gamsung mipi zosia tithei ding khawpte chu Jesu do in a le pan zotau a, thiamlo chansak ah tha tei tei ding vaisawm a Thagum sua ah a mat lai ua, A nungzuite

a dingah lungdawn a um dingdan leh lauthawng a um ding dan kha thiamlo chansak ding ah Vaihawmna mun ah ama panpitu mipakhat ziang chale umlona, ama hektu mipi tamtak te ma ang ah Jesu a din lai a, lauthawng kawm kawm ah a guk ah Jesu hungzui ham ham mipi lak ah kisel tawl tawlpa kiang a "Nangle a nungzuite lak ah Pakhat hilo lahem" ti thu hung dawngpa Aw git khan Simon Peter dip a suchak ding na lawm lawm e.

Dawtna chawmcha himaleh, zia hun ah thil umdante kha i ngaitua leh Dawnhu a haksa na ding e, Peter a kilep a "Ka hipuai" a ti thu kha la Bible ah la sim daw sin leh la lungthim in Peter kha la awimaw sek em? Tulai i gamsung ah Kochuamte thagau lam ah i dinmun te'u hitawh te in kua ahem Simon Peter awimaw ah simmaw thei ding?

Rom 13:11 na thu khan, *"Tulai hun umdante hi la het ziak un, ipmu lai thawhal*

HINNA VÂK

a hun tak zet tai, ti hia'i tiu; tu'hin chu i gin lim lai sang ua khan i hukdamna' u chu a naizaw tai'' atia , tu-masang, tu-madeu leh tu-laitak ah kochuam te Thagaulam ah i dinmun te' u hi hechiat ngei hitiu. Tu-madeu cha kochuam sung Thagau lam ah i dinmun uh kha chu a tangpi'n Pathian jâlin a hung nuam man mama ta Presbytery sung hita henla, Bial sung hitaleh Kochuam mal tin tiang in taksa leh thagau lam in ma i sawn mamau a, Pathian zal in kochuam sung a um a nuam a, i khawmpin nate a nuam thei ma ma ta, Nangle a nungzuite lak ah pakhat hilo lahem? Ei tilo khâk ding uh lau um khawpin kochuam sung a rawngbawltu hina i phâk tawk chiat un dik tak ah gen in, a guk tak in a chu in i chu' u ahi kha, kipak le a um mama hi ziagual tak ah Pathian nasepna i thatnawp uh kha, Pathian in a kochuam a chawihawi zia ah pen hi.

Ahinla, tu laitak ah kochuam sung ah thagaulam ah i

dinmun diktak uh hi zik ah kawiphat hihenla, khawvel dam in kum bangzat ahem liam nung in itu leh i chate' u in hung sim taleu chu, zia hun ah khan kapa'n Pastor na zia gual a hi ala sep ahi maw. Zia hun ah khan kapa'n Kochuam Upa na ziagual a hi ala sep ahi maw tiin tuhun ah Pastor na isep dante, Upa na isep dante, Tual Upa na isep dante, KNP na isep dante, KKP na isep dante, Evangelist na isep dante leh i Pathian nasepna' u bâk chuam chuam sep dan te' u leh tulai tak ah mimal tin in Pathian biakna i chiapi dan uh, Biak In lampi i zawtzat te' u, i pauchap zat te' u leh i Bible sim zat te' u hi tuban khangthak hung um dingte'n hung sim taleu chu zia hunlai tak ahin Jesu panpi ngamlo ah a kilep san ahi maw ti ding hi chu nautâng lak bep hilo inle rawngbawltu te lak ah hin kitam mama ta ding a hi.

Thupil pakhat chun, Buaina a um phatleh, mipil a het

thei in, Lau um a um phat leh, Mi hangsan a hetthei in, Haksatna a tun phat leh, Vaihawmtu thiam leh Puitu pha a kihe thei bep sek hi, ala tia. Peter in midang zosia zam leule, kei chu zam pua'ngka , La thi thina thiding hi ziang lengle hun kilep san lo hial ding kahi (Marka 14:27)

Jesu kiang a Peter in zia thu a gen hun hi Jesu nungzuitu hi a nawp laitak, a thatnawp um laitak a hi. A nawp laitak a hin chu bang genda di hem. Ei hawnle, *“Gospel hepiin malam zuanka, Ka Lal dawium min hawi hi panpi in, Zam pua'ngka khawvel ma in”* ti La kha, Dogal umlona mun ah Zam pua'ngka tiin Biak In sung galmuan na mun ah te khawmpi nuam tak i matna mun a te khan Aw thâm zen in i sa tho khalam, Peter hil hial in bawn a phatsan ahi chun hung phatsan pua'ngka ka Lalpa Jesu a le timaleng tiin lungthim in i kithamuan maithei hi.

Peter in Jesu a kilepsan lai hun kha hunthim leh hun haksa Penticost Thagau Thiangtho tun masang, Lau umna mun ah te, Haksatna mun ah te, Thamuantu ding panpitu ding Thagau Thiangtho piak a hi masang ua thiltung a hi. Zia hunthim leh hun haksa tak nuai ah hin Jesu nungzuite khan buaina leh haksatna a tuak te' u haw kha Thagau Thiangtho pang lo in, A gum-gawchang in a thuak mai uh a hi.

Penticost Thagau Thiangtho tun nung ah tulai kochuamte hin a haksat dingdan hi ki hethiam zo tak taklo a hi. Penticost Thagau Thiangtho a hung tun phatin vang nungzui te khan thil danglam tak a hung neitau a, masang a dengdel tak ah a zui sek uh Jesu ngei chun a Thagau in a sunglam un a hung chenchil ta, Nangmau ah kei um ka hidante hun hechian ta'n lau (Johan 14:20) ti thu Jesu'n ala gen kha a takin a hung changtau. Masang ah phatsan

HINNA VÂK

tute kha Thagau Thiangtho in a hung chenchil phatin, banggual ah hun haksa kâl inle Jesu a ding ah a ginum dante'u melma dogal lak ah le a hangsan dante'u leh Pathian lalgam a ding ah a phatchuam ngaidan te'u in a chanchin uh kha lopi tak in a tawp a hi.

Tulai i gamsung in haksatna leh buaina i tuaklai tak uh hin, Kochuam sunga Thagau lam ah i dinmun uh hi vang ki etchian thak a kûl takzet hi. Pianthakna diktak leh Thagau Thiangtho chan hi chansa leh neisa gualin ikingai ua changkanna lam ah ha tai ah itai lai un Thagau Thiangtho chenchilna tak tak

leh pianthakna diktak neilo tu a ding in vang ki dingzolo ding mawng a hi.

Bitna gam ah bawn kipuk lahi chun Jordan lingbuk lak ah bang suak ding la hinam (Jeremiah 12:5)

Tu laitak ah i gamsung in hun haksa i tuak ua Thagau lam ah kiakniamna nasa tak kochuam sung ah a tun lai tak ahin, Thagau Thiangtho in lalungsung in “*Nangle a nungzuite lak ah pakhat hilo lahem?*” tiin la umna mun tin leh La nasepna munte, la chiana mun taphawt in Jesu nungzuite lahina hun hetsak zing ta hen.

Matthai 2:6

Aw, nang Judai gam ah **Beth-lehem** khua, Judai gam ah thuneite lak in **neupen** pua'n la; la sung ah kipat in **vaihawmpa** hung pawt ding ahi ngal in, ka mi **Israelte** chingpa ding chu.

**DAMTHEINA LEH HISELNA DING AH
HETDING LEH ZUI DING AH PAWIMAWTE
ADIAK AH KAL (KIDNEY STONE)**

*Upa Th. Lalkhomang
Lamka Kochuam*

Nek leh dawn ah puitu/kiven na dingte :

Nek ding ah phate :

(Suggested Food)

1. Coconut Water
2. Lemon
3. Barley
4. Pineapple
5. Watermelon
6. Almonds
7. Banana
8. Carrot
9. Bittergourd
10. Horsegram

Neklo ding ah phate

(Avoid to eat)

1. Spinach
2. Tomato
3. Cheeku
4. Peanut
5. Cauliflower
6. Cucumber
7. Brinjal
8. Egg yolk
9. Mashroom
10. Cashew

***Thagau Ga kisumtheina hi mihing zosia'n i mat ding ah
phapente lak ah khat hi ngei ding a hi. (Galatia 5:23)***

Extracted from - Curosis Health-care Pvt. Ltd.

KNP HUANG

P.W.F 18th BIENNIAL CONFERENCE REPORTS :

Tangphai Provisional Synod CKNP min ah a khatvei na ding in PWF 18th Biennial Conference chu taksa leh thagau in lawting tak in aki mang hi.

Conference palai a pang te chu:

- i) Pi Lhingkhovah *Chairman*
- ii) Pi Hoipakkim *Secretary*
- iii) Pi Nengneithem *Asst. Secy.*
- iv) Pi Kh. Thianniang *Fin. Secy.*

Conference Reports leh PCIWA chungchang hetding pawimaw khenkhat te:

A mun : Mawpat Presbyterian Church,

KJP Synod Sepngi

A ni : 27th – 29th October 2023

Thupi : “Kung lam del ham ham” (Philippi 3:14)

Vaihawm palai mi 553 aki pang hi.

• Conference Speaker te:

- 1. Rev. B.R. Kharnaor, Administrative Secretary i/c PWF
- 2. Mrs. Vahkholhing, Zou Synod

- 3. Dr. Aleyamma Thomas, NCCI
- 4. Rev. Rolianthanga Lalsim, Biateram Synod

• Vaihawmna genkhawm te:

- 1. PCI Constitution siamthakna ah Numei Ordination piak ahi thei na ding ah PCI General Assembly ah tutto ding - KJP Synod Sepngi
Zia chu PCI General Assembly ah tutto ding ah pha ka sau hi.
- 2. PWF in nurse training chawp ding - KAPC Synod
Zia chu PWF Standing Committee in a hun bawzui ding ua ngansia ahii.
- 3. PWF Standing Committee in PWF Guideline Review a bawl nau achun Presbyterian Women Fellowship (PWF) chu Presbyterian Church of India Women Assembly (PCIWA) ti tak ding ti ah PCI ah tutto ding pha ka sau hi.

• PWF Unit reports ngaithak te:

- 1. Mizoram Presbyterian Kohhran Hmeichhe Inkhawmpui Lian of Mizoram Synod.

2. Presbyterian Women's Fellowship of CHT Synod.
 3. Manipur Presbyterian Women's Fellowship of Manipur Synod.
 4. Jingiaseng Kynthei KJP Synod Mihngi.
 5. Jingiaseng Kynthei KJP Synod Sepngi.
 6. Jingiaseng Kynthei Ri Bhoi Presbyterian Synod.
 7. Presbyterian Nupang Pol Biateram Synod.
 8. Presbyterian Women's Fellowship of Zou Presbyterian Church Synod.
 9. Central Ingjirmarti Amei Karbi Anglong Presbyterian Church Synod.
 10. Presbyterian Women's Fellowship Tripura Synod.
 11. Jingiaseng Kynthei KJP Provisional Synod Pdeng.
 12. Kochuam Numei Pawl Tangphai Provisional Synod.
 13. Barak Presbyterian Women's Fellowship.
 14. Meitei Singlup Presbyterian Synod (Unit report um theilo)
- **PWF Committee miguan**
 1. Puitu/OB – 6
 2. Standing Committee Member
 - i) Committee Member - 26
 - ii) PWF apat - 3
 - iii) Ex-Officio - 2
 3. Nomination Committee - 11
 4. Working Committee - 16
 5. PCI Committees ah PWF representatives panna te
 - i) PCI Executive Committee - 2
 - ii) Mission and Evangelism - 1
 - iii) Theological Education - 1
 - iv) Peace and Justice - 1
 - v) Christian Communication - 1
 - **Contributions:**
 1. 2021 a pat in PWF chun kumsin in PCI Centre for Capacity Building and Empowerment sak na ding in cheng 1,00,000/- (1 Lakh) a thaw sek hi.
 2. PCI Mission and Evangelism fund a ding in PWF chun cheng 30,000/- a thaw sek hi.
 3. PWF chun kum sin in PCI General Fund cheng 30,000/- a kipe sek hi.
 4. BSI ah 2018 apat in Lifetime membership a ding a ki pia a hi.

HINNA VÂK

5. PWF chun Manipur Relief Fund a ding cheng 1,00,000/- (1 Lakh) PCI ah a pia ahi.

• **PWF Budget (Biennium)**

- 1. 2021-2023 : ₹ 23,97,400/-
- 2. 2023-2025 : ₹ 30,53,000/-

• **Tangphai Provisional Synod PWF Budget (Annual)**

- 1. 2022-2023 : ₹ 23,500/-
- 2. 2023-2024 : ₹ 26,500/-
- 3. 2024-2025 : ₹ 26,500/-

• **19th PWF Biennial Conference**

A mun : KJP Synod Mihngi
A hun : 24th to 26th Oct., 2025
Thupi : “Heal our Land”
(II Corinthians 7:14)
Speaker: Dr. Rosy Zoramtangi, ATC
Bible Study : Dr. Wandahilin Kharlukhi, JRTC



I Synod in galtaite In ding a sakpiak te’u Inchuanna ding panpina thilpiak dawl piak ding ti ah CKNP te a hung ngansia dungzui in khawhing Kochuam tin te’n panpina thilpiak dawlkhawm na ala ki nei a, zia chu 31st October 2023 ni in Inkuan 55 te kiang in leh 20th November 2023 ni in Inkuan 39 te kiang in hawp dawna Synod Office ah ala kinei hi. Zia a Kochuam tin a sungkuan ti’n te kiphalna kipak um aki san, Bial/Kochuam ah KNP Committee member te a tawmngai na’u kipak um aki sa a hi. Chun Synod Office mun ah van kidawng te haw ei sukfel piak i Ex-Officio te leh Jubilee Kochuam KNP te chung in le kipak thu i gen a hi.

- 1) Lamka Pastor Bial - *Van*
- 2) Panglian Pastor Bial - *Van*
- 3) Mata Pastor Bial - *Van*



December 2023

- | | |
|--|--|
| 4) S. Munnuam Pastor Bial -
Van | 10) Kawlhen Pastor Bial - Van |
| 5) D. Phailian Pastor Bial -
Van | 11) Dumlian Pastor Bial -
Sum cheng 5,750/- |
| 6) Sugnu Pastor Bial - Van | 12) Phailianbung Pastor Bial-
Van |
| 7) Phaipheng Pastor Bial -
Van leh sum cheng 16,800/- | 13) Delhi Kochuam -
Sum cheng 17,000/- |
| 8) New Lamka Pastor Bial -
Van | 14) Guwahati Kochuam -
Sum cheng 12,700/- |
| 9) D. Khawzim Pastor Bial -
Van leh sum cheng 3,800/- | |



THAGAULAM PAUKIKNA

- Gawtmun chu eima 'lampi' kihaw ah tun ding ahi'n, Vangam ahileh chu Pathian 'lampi' bep, Jesu Kawtkhak chu haw ah lut ding a hi.
- Zu dawna a lungzin, lungkhamna sukbei gawte chu, a su-siatso zawbep sek ahiu.
- Sum neilo hi mi-chaga i tiu in, ahinla, sum bep nei ah bangmacha dang neilo chu a chaga zawsem ahiu.
- Mitthipna chun mi a kap tak leh, ama ma a liam sek hi.
- Gitlona'n launa a tuta, kipuandawna'n suachatna a tut hi.

~ S. Doliand Capvung, Muanna Aksi Oct-Nov, 1982

KKP HUANG

1. Kangvai Bial : Bial Huap Pauchap Khawmna

Ni 23rd September, 2023, Kiginni in Kangvai Bial KKP te'n Bial huap Pauchap Khawmna Chawlmunnuam Kochuam Biakin in a nei thei ui. Pauchapna puitu te chu Tv. Lalminlian, Bial KKP Secretary leh Tv. Lemlal, Bial KKP Asst. Leader te a hiu. Tuchung buai na hi Kangvai Bial ah Kochuam te hi Frontline ngen ah a um ziak un Pathian venbit na ziak ah kipakthu gen na leh maban ah Pathian mapui na te dawn in pauchap khawm na lawting tak in a nei thei u'i.



2. Bethany Branch : Relief Insak na um te Thilpiak nei

D. Phailian Pastor Bial huap sung ah KKP Bethany Branch te'n Kumbul Vaihawmna bawl ding ah pha a sak uh

Outreach Programme chu Gam sung buaina ziak ah mimal ah pe lo in, I mi leh sa In leh Lo nusia hung gal zam ah Kochuam in Relief House a sak na cheng te – S. Bualkot khua sungkuan 12 leh Sumtukphai khua sungkuan 45 te kiang in pawimaw hun ah a mat ding un Emergency Lamp/Table Lamp ni 7th November, 2023 ni'n sungkuan tin ah a chankim ding ua piak daw na a nei u'i.



3. Synod Choir te Lasak na

Kuki Christian Leaders Forum te guanggal Nampi Anngawl Pauchapna Programme ah Pathian chawihawi na La sa ding ah chial ahi dung zui un, ni 4th November, 2023 Kiginni in zia Programme

ki mat na Peace Ground mun in lawting tak in Pathian Chawihawina La “Chuai ngailo Lal Jesu” asa thei ui. Zia ban a chun 25th November 2023 ni’n Christian Goodwill Council te guanggal na Programme in EBCC Centenary Hall, Hebron veng in Pathian Chawihawina La “Jing ni vak” a sa thei ui.



4. CKKP Panlakna te

Synod panlakna S. Bualkawt khua galtai te chenna In ding aki sak hun in CKKP Committee Member ten ni 30th August, 2023 ni’n vethak na nei a hi. Zia ban a chun, CKKP Committee Member te leh Synod

Choir Member te’n ni 28th October, 2023, Kiginni, in Buallian khua ah Synod panlakna Kochuam te In sak na thawlawm kuan a hi. S. Bualkawt khua in sakna leh Buallian khua insak na hin Kochuam te kiang in Refreshment ding in Chini leh Bawngnawi piak a hi.

Chuleh, Ni 7th November 2023 Sepkitni hin Relief Van sutup ding ah Synod Office a pat chialna aki mu dungzui in CKKP Committee Member te a ki kuan thei hi.





SUNNA

UPA JAMLIANKHUP

(1977-2023)



Upa Jamliankhup (46) hi Upa Pauneimang leh Pi Nemhoiting chate pa 9 (Pawsal – 6 leh Numei – 3) lak ah pawsal a panina a hi. Kum 1977 in Phailianbung khua'n ala piang hi. Kum 2000 kum in Pi Dimenting tawh ala kicheng un, Pathian malsawmna gil aga pawsal pali (4) leh numei pakhat (1) a nei ui.

Phailianbung ME School in Class-V chan ala sim in, aban lekha sim zawm nuam in Rostad Memorial High School in Class-VIII chan ala sim hi.

Hun hung chia to zel in 2002 kum in asungpa (L) Pu Thangzalam, chief of Thiakbung, vangsiatna ziakin Thiankbung khua'n ava cheng lut in, kum bang hem zat chang asung leh pi lungngai thafang tak ah um chu panpitu ding ah ahung dawt/chial ziak in ava khawsa ui.

25th June 1991 in Pastor Lamkhokai khut in Baptisma ala chang hi. Chun, 9th October, 2016 in Thiakbung khua Kochuam Upa hiding in, Tanggam Presbytery Kikhawmpi, D.Khawzim Kochuam Biak In mun in Upa Siakkap, Moderator in namdetna ala bawl hi. Thiakbung kochuam enkawl in pan theitawp in ala zing hi.

Cha leh naute thiamzilna lam ngaikhawkna ziak in, kum 2017 ah kipat in Gangpimual khua leh Thiakbung khua kawmtua dan in ahung khawsa. Kum 2020 September tha vai apat in damlona hung nei in doctor mun chuam chuamin ala kietsak a. Covid-19

December 2023

khawksiat laitak October 2020 tha vai in hung hatlo deu deuin ahung um phat in Zion Clinic ah Dr. Jamkhopum in chawmkhat ki kaitua sak in, phachuam tak taklo ah ahung um phat in Imphal ah Raj Medicity in referred bawl in ala um ah. December 2020 tha bul vai in Raj Medicity mun in etkawl ala hin. Zia kipat a chun Hydrocetaphalus – thuak (Brain) ah thisan lut – natna nei ahi ti hung kihedawd in operation ni vei hial ala kibawl hi. Tha kimkhat vai ki enkawl ahi nung in 21st December, 2020 in ahung pawtdawd in inlam ah kikaitua zing ah um zing lai chu hung gimsia phut in 20th October, 2023 zan dak 10:00 PM vai in azi, acha, a ît angai cheng nusia in, khialatak kawm in Pro. Pastor Lalgoulian in vuiliamna hun mang in Kochuam in thak liam ahi tai.

*Report petu
Upa Kaphianlam
Bial Secretary (Sr.)
Phailianbung Pastor Bial*

HINNA VÂK

REV. M. THANGKHOKAM
(1954-2023)



Rev. M. Thang Kam Zou hi (L) Pu Thong Mang Zou leh (L) Pi Lam Nei Kim te chapa upa pen ahia, Date 15/5/1954 kum in ala piang hi. A pianpi a U leh Nau te chu -

1. (L) Pi Niang Hat
2. (L) Pi Chin Kho Nem
3. Rev. M. Thang Kho Kam
4. Pu Khup Thang
5. (L) Tv. Thang Lian
6. Pa Kham Gin
7. Nu Niang Khan Chin
8. (L) Pa Thang Khan Pau
9. Pa Lhu Kho Sei (Ex. Chairman ADC Chandel)
10. (L) Pa Pum Gin Mang te ahiau.

Rev. M. Thang Kam hin chapa chanu ala nei te chu -

1. Pa Mang Kho Pau
2. (L) Tv. Mang Min Thang
3. Nu Ting Ngai Hawi
4. (L) Tv. Lian Khan Thang
5. (L) Nk. Kim Lam Ngai te a hiau.

A ma hi 15/5/1974 kum in Rev. Lal Kho Lun (Kuki Baptist Association) khut in Baptisma ala chang hi. 1988 kum in Homalin ah discipleship training ala kai a MCO kochuam chawp na in June 1988 kum in missionary in a In a lo nusia, a zi Nem Za Niang

December 2023

tawh Vuitok in ala kuan ua, thagau mangthai te kiang ah khrista hukdamna nasem in ala kipia dawk un a hi.

Chun, Date 14/2/1999 kum in Evangelical Organization Church khut nuai in pastor ordination ala chang in a hi. Myanmar mission field (EOC) ah mission supervisor na kum (10) vel ala sem in a hi. Zia gual a chun Pathian na hun semto in Presbyterian Church (MPCS) nuai in 2016, December in kum ting pension ala mu ta'n a hi. Ama hi kochuam ngaina tak leh kochuam sung ah haksa leh gentheite ngaikhawk tak mi leh kipia zo mi a hi. Nanphalong Presbyterian Kochuam Biak In mun le aman ala chaw, kochuam te'n tuni chan ah Pathian Biak khawmna leh Pastor Quarters sakna mun in aki mang in a hi.

2018 kum in hung hisel lo pan in, Imphal lam leh Kalaymyo lam a te damdawi In ah ala ki enkawl zing a, sunglam hatlo, BP sang leh zunthum (Diabetes) thua zing ala hi. In ah Insung mi a Zi Nu Nempi leh a tunu Nk. Niangngaiboi in hun sawttak a buai pi nung un nikhat ban nikhat khia suk deu deu in Date 5/10/2023 (Ningani) sun 1:00 PM in a ngai Insung mi, khua leh kochuamte nusia'n Pa kiang in ei chawl san ta'n a hi.

*Report petu
Pastor Thangliansang
i/c Nanphalong Pastor Bial*